


ETBko nazioarteko katea eskatu du euskal diasporak

MUNDUAN barrena sakabanatuta dauden euskal etxeen arazorik handienetakoa Euskal Herriari buruzko informazioa lortu eta sorteriarekiko loturari eustea da. Horrexegatik, ETBko nazioarteko katea sortzea proposatu diote, besteak beste, Jaurilaritzari. Euskal Kolektibitateen Munduko I. Biltzarren barruan, atzerriko euskal etxeei buruzko txostena aurkeztu zuen atzo Iñaki Agirre Euskal Komunitateekiko Harremanetarako zuzendariak. Haren arabera, euskara eta, oro har, euskal kultura gordetzeko dituzten zailtasunak eta Euskal Herriari buruzko informazio eskasiak kezkatzen ditu gehien.



Funtzionarioak euskalduntzeko plana datorren astean aztertuko dute berriz ere

■ Garmendiak ez zuen argitu atzokoan aurrerapausorik eman zen ala ez

Erredakzioa / Donostia

FUNTZIONARIOEN euskalduntze planaren bigarren fasea zertan gauzatuko den erabakitzeke bilera izan zuen atzo horretarako propio sortutako batzorde hirukoak. Bileraren aurretik atzokoan datorren bost urteetarako egitasmoaren nondik norakoak zehaztuta geratzeko zirela pentsatzen zen arren, Mari Karmen Garmendia-Jaurilaritzako Kultura sailburuak plana aztertzen jarraitzen dutela baino ez zuen jakinarazi ondoren. Garmendiak esan zuenez, dena den, lantaldea datorren astean bilduko da: «Datorren astean bilduko da berriz ere lan batzordea. Ez du oraindik bere lana bukatu, nahiz eta luzatu baino lehen bukatzea nahiko litzatekeen», jakinarazi zuen.

Aurreko bileran hiru puntu geratu ziren erabakitzeke, horietariko bat datorren bost urteetarako plan berrian zer nolako perfilak eskatu behar diren: EA eta EAJk perfila lanpostuaren arabera definitu behar dela defenditu zuten; PSOE-EEK berriz, perfila lanpostu hori kokatuta dagoen lurraldearen egoera kontuan hartuta zehaztu behar dela. Perfila lanpostua lortu aurretik garantizatu behar ote den ere erabakitzeke geratu zen; EA eta EAJren arabera, lanpostua eman aurretik bermatu behar da euskara maila, hartara funtzionario horiek euskaldundu beharrik ez bailitzateke izango plan berrian. Dena dela, egitasmo berrian euskararen erabilera bultzatu nahi da batez ere, finean, perfilak lortzea baino garrantzitsuagoa baita, EAren ustez, administrazioan euskara erabiltzea.

Aurreko bileratik zintzilik geratu zen beste puntu bat ere ateratzekoa zuten atzo mahai gainera, aurreko planean perfila bete ez zuten mila funtzionario ingururekin zer egingo duten alegia. Gehien kasuak aztertu, eta dagokien euskara maila lortzeko epea luzatu egingo da seguruenera.

Atzokoan horiei buruzko erabaki zehatzik hartu zuten, baina, ez zuen zehaztu nahi izan Garmendiak. «Esan nahiko nukeena haxe da, legez jarritako irizpideek hor jarraitzen dutela; beste kontu bat da bost urte hauek eginda gero nola egokitzen diren aldi honetara». «Eta hor», gaineratu zuen Garmendiak, «normala da denak iritzi berekoak ez izatea. Batetik, non gauden ikusi behar da eta, bestetik, ondoren nola heldu behar zaion. Eta horretan saiatzen ari dira batzordekideak». X

Helduen euskalduntze-alfabetatzea

Garmendiak beharrezkotzat jo du AEK-k akordio bideari «jarraipena» ematea

Koordinakundeari HABErekin biltzeko hirugarren eskaera gutuna igorri zion atzo

Mari Karmen Garmendia Kultura sailburuak dioenez AEK-k «jarraipena» eman behar dio bi aldeen arteko prozesuari Josune Ariztondo HABEko zuzendari nagusiarekin «lehenbailehen» bilduz. Hau eskatzen duen hirugarren gutuna atzo igorri zion Garmendiak Koordinakundeari.

Luis Karlos Garcia / Gasteiz

GARMENDIAK «zain» dirauela dio. Atzo goizean HABErekin biltzera joatea eskatzen duen hirugarren gutuna bidali zion Alfabetatze eta Euskalduntze Koordinakundeari (AEK), eta hain zuzen ere, bi aldeen arteko harreman hori izatea akordio prozesuak aurrera egin dezan ezinbesteko baldintza dela dirudi une honetan Jaurilaritzaren iritzari dagokionez.

Kulturako buruak atzo arratsaldean Jaurilaritzaren Gobernu Batzordearen erabakiei buruzko prentsaurrekoan aitortu zuen duela bi aste AEKren erantzuna jaso zuela bi aldeek negoziatu «testu zirriborroari» Koordinakundeko Biltzar Nazionalak onespina jakinarazteko. «Honek,



Mari Karmen Garmendia Jaurilaritzako Kultura sailburua.

ANDER GILLENEA

baina, jarraipena behar du», gaineratu zuen gero.

«Jarraipen» hori biltzea da. «AEK-ko ordezkariari gutuna bidali diot HABEko zuzendari nagusiak berarekin datozen egunetan bildu nahi duela adierazteko, eta beraz, lehenbailehen harremanetan jar dadin», deklaratu zuen Garmendiak, «eta gauzak horrela, nik uste gehiagoko lu-

zapenik gabe AEK gurekin harremanetan jarriko dela».

Alorreko taldeekin bilerak ostegunean amaitu ziren.

• Pasa den urriko erdialdean Josue Ariztondok kargua hartu zuen HABEko zuzendaritzan. Orduan Garmendiak biltzeko eskaera igorri zien alfabetatze eta euskalduntze alorrean dihardutenei. «Zortziri deitu eta zazpi etorri ziren», esan zuen AEKren falta nabarmentzearen. «Geroztik bi aldiz idatzi nien, baina AEK-k ez etortzea erabaki zuen», erantsi zuen. Koordinakundeak «agenda arazoak» arrazoitu zituen bilerara joan ez izana adierazteko.

Garmendiak informatu zuen Kultura eta HABEko buruek joan zen ostegun iluntzean izan zutela

azkeneko bilera alorreko taldeekin eta oro har «oso inpresio ona» ateratu dela «bai egindako planteamenduen inguruan eta baita proposatutako lan prozedurari buruz ere». Baikortasun hori bi aldeei dagokiela esan zuen.

Bilerak eginda «lan programari» ekingo diotela esan zuen eta hortxe AEK izatea espero duela aipatu zuen. AEK-k «betidanik» alorreko agente guztiekin batera plangintzari heltzea eskatu izan duela ohartarazi, eta hain juxtu, Kulturak horretan diharduela esan zuen.

Garmendiak ildo hori jorratu nahi du, «homologazio eta normalizaziorako urratsak ematea alor honetan legegintzaldian egin behar dugun eginkizun nagusietako bat baita». X

Euskalduntze-alfabetatze alorreko taldeekin izandako bileretaz bi aldeek «oso inpresio ona» ateratu dutela azaldu zuen Garmendiak, «bai egindako planteamenduen inguruan eta baita proposatutako lan prozedurari buruz»